

圣求词

吕渭老

文硕阁

wenshuoge.com

目录

关于我们	3
圣求词序	5
圣求词全文	6

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望可以帮助有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

圣求词序

世谓少游诗似曲子瞻曲似诗其然乎至荆公桂枝香词子瞻称之此老真野狐精也诗词各一家惟荆公备众作艳体虽乐府柔丽之语亦必工致真一代奇材后数十年当宣和末有吕圣求者以诗名讽咏中率寓爱君忧国意不但弄笔墨清新俊逸而已其忧国诗云忧国忧身到白头此生风雨一沙鸥又云尚喜山河归帝子可怜麋鹿入王宫痛伤诗云尘断征车【阙】云低【阙】帐深古今那有此天地亦何心释愤诗云未前嵇绍血谁发谏臣章赤心皆【阙】诗史气象搢绅巨贤多录藁家藏但不窥全帙未能为刊行也一日复得圣求词集一编婉媚深窈视美成耆卿伯仲耳余因念圣求诗词俱可以传后惜不见他所著述以是知世间奇才未乏也士友辈将刻圣求词求序于余故余得言其大槩圣求居嘉兴名滨老尝位周行归老于家云嘉定壬申中秋朝奉大夫成都路转运判官赵师防序

圣求词 全文

☆薄幸

青楼春晚。昼寂寂、梳匀又懒。乍听得、鸦啼莺弄，惹起新愁无限。记年时、偷掷春心，花间隔雾遥相见。便角枕题诗，宝钗贯酒，共醉青苔深院。

怎忘得、回廊下，携手处、花明月满。如今但暮雨，蜂愁蝶恨，小窗闲对芭蕉展。却谁拘管。尽无言、闲品秦筝，泪满参差雁。腰支渐小，心与杨花共远。

☆望海潮

侧寒斜雨，微灯薄雾，匆匆过了元宵。帘影护风，盆池见日，青青柳叶柔条。碧草皱裙腰。正昼长烟暖，蜂困莺娇。望处凄迷，半篙绿水浸斜桥。

孙郎病酒无聊。记乌丝醉语，碧玉风标。新燕又双，兰心渐吐，嘉期趁取花朝。心事转迢迢。但梦随人远，心与山遥。误了芳音，小窗斜日对芭蕉。

☆选冠子

雨湿花房，风斜燕子，池阁昼长春晚。檀盘战象，宝局铺棋，筹画未分还懒。谁念少年，齿怯梅酸，病疏霞盏。正青钱遮路，绿丝明水，倦寻歌扇。

空记得、小合题名，红笺青制，灯火夜深裁剪。明眸似水，妙语如弦，不觉晓霜鸡唤。闻道近来，笋谱慵看，金铺长掩。瘦一枝梅影，回首江南路远。

☆选冠子

风约晴云，花干宿露，帘幕万家清晓。青帘赛酒，小坞藏春，冶叶艳枝相照。羊驾小车，笑逐游人，远迷芳草。更红英飞舞，绣茵连接，雾台烟沼。

年少日、细马戎，红靴玉带，同指软尘西笑。珍珠戏掷，彩笔搜奇，不觉暮春莺老。谁见这回，霜点髭髯衰，事萦怀抱。诉一春心事，燕子周遮来了。

☆念奴娇（赠希文宠姬）

暮云收尽，霁霞明、高拥一轮寒玉。帘影横斜房户静，小立啼红蔌蔌。素鲤频传，蕉心微展，双蕊明红烛。开门疑是，故人敲撼窗竹。

长记那里西楼，小寒窗静，尽掩风筝鸣屋。泪眼灯光情未尽，尽觉语长更促。短短霞杯，温温罗帕，妙语书裙幅。五湖何日，小舟同泛春绿。

☆情久长

锁窗夜永，无聊尽作伤心句。甚近日、带红移眼，梨脸择雨。春心偿未足，怎忍听、啼血催归杜宇。暮帆挂、沈沈暝色，袞袞长江，流不尽、来无据。

点检风光，岁月今如许。趁此际、浦花汀草，一棹东去。云窗雾阁，洞天晓、同作烟霞伴侣。算谁见、梅帘醉梦，柳陌晴游，应未许、春知处。

☆情久长

冰梁跨水，沈沈霁色遮千里。怎向我、小舟孤楫，天外飘逐夜寒侵短发，睡不稳、窗外寒风渐起。岁华暮、蟾光射雪，碧瓦飘霜，尘不动、寒无际。

鸡咽荒郊，梦也无归计。拥绣枕、断魂残魄，清吟无味。想伊睡起，又念远、楼阁横枝对倚。待归去、西窗剪烛，小合凝香，深翠幕、饶春睡。

☆满江红

晚浴新凉，风蒲乱、松梢见月。庭阴尽、暮蝉啼歇。萤绕井阑帘入燕，荷香兰气供摇D64E。赖晚来、一雨洗游尘，无些热。

心下事，峰重叠。人甚处，星明灭。想行云应在，凤凰城阙。曾约佳期同菊蕊，当时共指灯花说。据眼前、何日是西风，凉吹叶。

☆满江红

笑语移时，风影乱、半帘寒日。鲜明是、晚来妆饰。共说西园携手处，小桥深竹连苔色。到如今、梧叶染清霜，封行迹。

春未透，梅先拆。人纵健，时难得。想明年虚过，上元寒食。数著佳期愁入眼，雨珠零乱梨花湿。任翠鬟、欹侧背斜阳，鸣瑶瑟。

☆满江红

燕拂危樯，斜日外、数峰凝碧。正暗潮生渚，暮风飘席。初过南村沽酒市，连空十顷菱花白。想故人、轻障游丝，闻遥笛。

鱼与雁，通消息。心与梦，空牵役。到如今相见，怎生休得。斜抱琵琶传密意，一襟新月横空碧。问甚时、同作醉中仙，烟霞客。

☆满江红（次杨子耕韵）

山绕吴城，修竹外，满林围碧。任孤檣百丈，远牵江色。政简民闲无一事，同游仍是鸳鸯客。到晚年、遗爱续新题，都堪说。

修门赋，今谁续。痛饮士，天应惜。正彩霞垂帙，暮风飘瑟。笑疾禅痴今在否，风灯石火同飘忽。去醉乡、深处著身心，休铭栢。

☆醉蓬莱

任落梅铺缀，雁齿斜桥，裙腰芳草。闲伴游丝，过晓园庭沼。厮近清明，雨晴风软，称少年寻讨。碧缕墙头，红云水面，柳堤花岛。

谁信而今，怕愁憎酒，对著花枝，自疏歌笑。莺语丁宁，问甚时重到。梦笔题诗，帕绫封泪，向风箫人道。处处伤心，年年远念，惜春人老。

☆齐天乐（观竞渡）

香红飘没明春水，寒食万家游舫。整整斜斜，疏疏密密，帘幰旗红相望。江波荡漾。称彩舰龙舟，绣衣霞桨。舞楫争先，歌笑箫鼓乱清唱。

重来刘郎又老，对故园桃红春晚，尽成惆怅。泪雨难晴，愁眉又结，翻覆十年手掌。如今怎向。念舞板歌尘，远如天上。斜日回舟，醉魂空舞扬。

☆沁园春

复把元宵，等闲过了，算来告谁。整二年三岁，尊前笑处，知他陪了，多少歌诗。岂信如今，不成些事，还是无聊空皱眉。争知道，冤家误我，日许多时。

心儿。转更痴迷。又疑道、清明得共伊。但自家晚夜，多方遣免，不须烦恼，雨月为期。用破身心，博些欢爱，有后不成人便知。从来是，这风流伴侣，有分双飞。

☆满路花（同柳仲修在赵屯）

西风秋日短，小雨菊花寒。断云低古木，暗江天。星娥尺五，佳约误当年。小语凭肩处，犹记西园。画桥斜月阑干。

鸟啼花落，春信遣谁传。尚容清夜梦、小留连。青楼何处，宝镜注婵娟。应念红笺事，微晕春山。背窗愁枕孤眠。

☆蓦山溪

韵高格妙。不数闲花草。向晚小梳妆，换一套、新衣始了。横钗整鬓，倚醉唱清词，房户静，酒杯深，帘幕明残照。

扬州一梦，未尽还惊觉。自恁在心头，拈不出、何时是了。吴霜点鬓，春色老刘郎，云路远，晚溪横，谁见桃花笑。

☆蓦山溪

元宵灯火。月淡游人可。携手步长廊，又说道、倾心向我。归来一梦，整整十年余，人似旧，去无因，牵惹情怀破。

章台杨柳，闻道无关锁。行客挽长条，悄不似、当初些个。而今休也，摇落任东风，但恁意，尽留情，我也知无那。

☆千秋岁

宝香盈袖。约腕金条瘦。裙儿细裯如肩皱。笑多簪髻侧，语小丝簧奏。洞房晚，千金未直横波溜。

缘短欢难又。人去春如旧。枝上月，谁携手。宿云迷远梦，泪枕中残酒。怎奈向，繁阴乱叶梅如豆。

☆早梅芳近

画帘深，妆阁小。曲径明花草。风声约雨，暝色啼鸦暮天杳。染眉山对碧，匀脸霞相照。渐更衣对客，微坐自轻笑。

醉红明，金叶倒。恁看还新好。莹汪粉泪，滴烁波光射庭沼。犀心通密语，珠唱翻新调。佳期、定期、定约秋了。

☆醉落魄

明窗读《易》。时才人地俱超轶。偶然一堕槐安国。说利谈功，这事怎休得。

何时置酒图书室。挥弦目送西飞翼。夜来已觉春筍溢。月影三人，一醉旧相识。

☆醉落魄

纤鞋窄袜。红茵自称琵琶拍。明衣妆脸春梳掠。好好亭亭，那得恁标格。

匆匆一醉霜华白。归来偏记蓝桥宅。五更残梦迷蝴蝶。觑著花枝，只被绣帘隔。

☆惜分飞（元夕）

白玉花骢金络脑。十里华灯相照。帘映春窈窕。雾香残腻桃花笑。

一串歌珠云外袅。饮罢玉楼寒悄。归去城南道。柳梢猎猎东风晓。

☆浣溪沙

烟柳濛濛鹄做巢。青青弱草带斜桥。莺声多在杏花梢。

逐伴不知春路远，见人时著小词招。阿谁有分伴吹箫。

☆浣溪沙

彩选骰儿隔袖拈。整钗微见玉纤纤。夜寒窗外更垂帘。

好事灯花双作蕊，照人月影入斜檐。新愁日日座中添。

☆浣溪沙

做得因缘不久长。惊风枝上偶成双。归来魂梦带幽香。

灯下揉花春去早，竹间影月索归忙。十年前事费思量。

☆渔家傲（作浮图语送深上人游庐山）

闻道庐山横广泽。晴空万顷波涛白。上有至人营窟宅。经游客。古今多是烟霞谪。

一钵上人轻六翮。选场要射如来策。点化黄金非妙药。难堪酌。三生一口都吞却。

☆渔家傲

昨夜山空流石乳。道人妙手亲拈取。未欲凌云归洞府。清风举。大千一叶同掀舞。
笑把须弥挝破鼓。东山云作西山雨。我欲住庵无挂斧。君相许。三更明月湖心午。

☆渔家傲

潦倒瞿昙饶口悄。拈花冤道头陀笑。鸡足山中眠未觉。谁知道。至今功业犹分割。
唇口周遮何日了。禅床四面藤萝绕。有个路头君试讨。梅花老。南园蝴蝶飞芳草。

☆渔家傲

高绶袈裟挑纸帔。一杯茶罢成行计。路入庐山风细细。轻弹指。百千三昧俱游戏。
法椅何曾烧两臂。谁知纸上无穷意。欲识普贤真实际。地。小炉雪夜和衣睡。

☆渔家傲

顶上铁轮飞火焰。防身细按威神剑。体用双行谁敢觐。光闪闪。何须更把茶林撼。
衲子家风存古俭。一条概栗如天堑。粥鼓未鸣灯火暗。无恩念。断崖古木横藤簟。

☆渔家傲

落月杜鹃啼未了。粥鱼忽报千山晓。笠子盖头衣钵少。穿林表。回头高刹空中小。
官路旧多林木绕。露浓花蕊皆颠倒。渡水登山排草草。庐山好。香炉峰下湖波渺。

☆思佳客

江上何人一笛横。倚楼吹得月华生。寒风堕指倾三弄，小市收灯欲二更。
持蟹股，破霜橙。玉人水调品箏。细看桃李春时面，共尽玻璃酒一觥。

☆思佳客

微点胭脂晕泪痕。更衣整鬓立黄昏。春风搅树花如雨，夕霭迷空燕趁门。
题往事，锦回纹。春心无定似行云。深屏绣幌空愁独，明月梨花殢一尊。

☆好事近

别酒带愁酸，千里失群黄鹄。行到小桥梯下，便飞云南北。
不妨垂手小徘徊，日影转阑曲。从此贺囊佳制，有新奇题目。

☆好事近

飞雪过江来，船在赤栏桥侧。惹报布帆无恙，著两行亲札。
从今日日在南楼，鬓自此时白。一咏一觞谁共，负平生书册。

☆好事近

年少万函书，朱紫只应低拾。更赖主人明眼，作青云梯级。
归来应是印累累，笳鼓闹乡邑。若访老人生计，贩谢郎蓑笠。

☆好事近

云影护梅枝，短短未禁飞雪。彩幅自题新句，作催妆佳阕。
西楼昨夜五更寒，恐一枝先发。元是素娥无寐，贺半轮明月。

☆好事近

小饮破清寒，坐久困花颓玉。两行艳衣明粉，听阿谁拘束。
丽华百媚坐来生，仙韵动群目。一曲凤箫同去，倦人间丝竹。

☆天仙子（代人送希文）

楼下辘轳横露井。楼上婵娟开晓镜。下楼难忘上楼时，风未定。帆不正。簌簌珍珠挥尘柄。
眉上新愁吹不醒。别酒未斟歌未忍。雪中梅下定重来，烟暝暝。肠寸寸。莫放笛声吹落尽。

☆燕归梁

楼外东风杜宇声。双枕细眉颦。女郎番马小山屏。金笼冷、梦魂惊。

起来重绾双罗髻，无个事、泪盈盈。杨花蝴蝶乱分身。飞不定、暮云晴。

☆小重山（七夕病中）

半夜灯残鼠上檠。上窗风动竹，月微明。梦魂偏记水西亭。琅玕\碧，花影弄蜻蜓。

千里暮云平，南楼催上烛，晚来晴。酒阑人散斗西倾。天如水，团扇扑流萤。

☆河传

斜红照水。似晴空万里。明霞相倚。逐伴笑歌，小立绿槐阴里。谙没些、春气味。

纷纷觑著闲桃李。浅浅深深，不满游人意。幽艳一枝，向晚重帘深闭。是青君、爱惜底。

☆清平乐（上元赵仲能窗下）

水瓶石砚。败壁蜗书篆。窗下日舒缝衲线。屋角晚风飞霰。

上元灯火佳时。长廊语笑追随。高卧一番纸帔，觉来月贯南枝。

☆握金钗

风日困花枝，晴蜂自相趁。晚来红浅香尽。整顿腰肢晕残粉。弦上语，梦中人，天外信。

青杏已成双，新尊荐樱笋。为谁一和销损。数著佳期又不稳。春去也，怎当他，清昼永。

☆握金钗

向晚小妆匀，明窗倦裁剪。见花清泪遮眼。开尽繁桃又春晚。心下事，比年时，都较懒。

胡蝶入帘飞，郎声似莺啭。见来无计拘管。心似芭蕉乍舒展。归去也，夕阳斜，红满院。

☆南歌子

策杖穿荒圃，登临笑晚风。无穷秋色蔽晴空。遥见夕阳江上、卷飞蓬。
雁过菰蒲远，山遥梦寐通。一林枫叶堕愁红。归去暮烟深处、听疏钟。

☆南歌子

远色连朱阁，寒鸦噪夕阳。小炉温手酌鹅黄。掩乱一枝清影、在寒窗。
念远歌声小，嗔归泪眼长。纤腰今属冶游郎。朝暮楚宫云雨、恨茫茫

☆蝶恋花

风洗游丝花皱影。碧草初齐，舞鹤闲相趁。短梦乍回慵理鬓。惊心忽数清明近。
逐伴强除眉上恨。趁蝶西园，不觉鞋儿褪。醉笑眼波横一寸。微微酒色生红晕。

☆蝶恋花

花色撩人红入眼。可是东君，要得人肠断。欲诉深情春不管。风枝雨叶空撩乱。
谩插一枝飞一酉戈。小赏幽期，破我平生愿。珍约未成春又短。但凭蝴蝶传深怨。

☆品令

绣衣未整。傍窗格、临清镜。新霜薄雾，这下几日，阴晴不定。欲插黄花，心事又
还记省。

去年香径。共粉蝶、闲相趁。宝香玉珮，暗解付与，多情荀令。何日西楼，重见暮
帆烟艇。

☆祝英台

宝蟾明，朱阁静，新燕近帘语。还记元宵，灯火小桥路。逢迎春笋柔微，凌波纤稳
，诮不顾、斗斜三鼓。

甚无据。谁信一霎是春，莺声留不住。柳色苔痕，风雨暗花圃。细看罗带银钩，绡
巾香泪，算不枉、那时分付。

☆水调歌头

其兄进道作水调歌头一韵，几二十首，读之，殆不胜情。次其韵作一篇，怀其人，亦以赠元发、说道\\

扁舟思独往，橈影划晴烟。要伴人随明月，踏破水中天。谁信骑鲸高逝，空对笔端风雨，如泛楚江船。老子穷无赖，端欲把降竿。

白萍汀，归老计，似高闲。平生爱我，一言相置二刘间。准拟何山松桂，折足铛能安稳，芋火对阑残。何必少林语，立雪问心安。

☆水调歌头（明日，纯中以酒见贻，约即见过。徘徊江上久不至，复次其韵）

江湖堪极目，非雾亦非烟。故人相见，纵横高义薄云天。已具莼尊茗话，怅望云中江树，不见子猷船。日色隐林表，十里认帆竿。

百年间，无个事，且安闲。功名两字，茫然都堕有无间。且尽身前一醉，休问古来今往，及取菊花残。仙事占无据，竹帛笑刘安。

☆水调歌头（壬寅九月，谒季修，题其书室壁曰秋斋梦谒，复以进道韵续之）

秋斋多梦谒，舌本欲生烟。独步一庭明月，雁字已横天。作个生涯不遂，松竹雨荒三径，却忆五湖船。小阮贫尤甚，犊鼻挂长竿。

白鸥汀，风共水，一生闲。横琴唳鹤，要携妻子老云间。灯火荧荧深夜，高卧南窗折几，杯到不留残。莫遣江湖手，遮日向长安。

☆水调歌头（壬寅十月二十四日饮少酒径醉拥案而寝。中夜酒醒次其韵作一篇）

心肝皆锦绣，落笔尽云烟。诗狂酒兴，要骑亦鲤上青天。织女回车相劳，指点虚无征路，翻动月明船。举手谢同辈，岂复念渔竿。

我平生，心正似，白云闲。衣冠污我，偶逢游戏到人间。常念孤云高妙，若作辘轳俯仰，谁复食君残。拜尘金谷辈，都是卧崇安。

☆水调歌头（哭进道。“飞桥自古双溪合，怪柳如今夹岸垂”。么金店别业诗）

诗人翻水尽，寂寞五侯烟。醉魂何在，应骑箕尾列青天。记得平生谈笑，夹岸手栽杨柳，同泛夜深船。溪水还依旧，深浅半青竿。

小神仙，殷七七，许闲闲。黄粱未熟，经游都在梦魂间。我厌嚣尘浊味，几欲凌云羽化，鸡犬不留残。俗事丹砂冷，且抱一枝安。

☆水调歌头

其韵而寄之\\

暮云遮远眼，叠叠入青烟。十年不见，醯鸡同舞瓮中天。闻道山阴回棹，相去都无百里，李郭可同船。行止皆天意，端欲自操竿。

功名事，须早计，真安闲。高才妙手，不当留意市廛间。俄已山林长往，尘面时时拂镜，齿发甚衰残。廊庙非吾事，茅屋且安安。

☆水调歌头（与小饮）

抚床多感慨，白发困风烟。出门有碍，更堪寒暮雪飞天。君弃一盂一衲，奔走五湖清海，杯度不乘船。来访山中友，□□□□竿。

看人间，谁得似，谪仙闲。生涯不问，留情多在酒杯间。剪烛西风谈笑，零落一尊相对，不觉已更残。回首功名事，笺记谢任安。

☆水调歌头（送季修同希文去秀）

十年禅榻畔，风雨扬茶烟。跳丸日月，未甘白发困尧天。江左风流才子，要伴江湖张翰，同泛洛阳船。酌酒情无尽，海燕绕船竿。

逼人来，功业事，不教闲。男儿三十，定当谈笑在堂间。老子婆娑贫态，闭户长须赤脚，他日要分残。禹浪桃花影，归棹正轻安。

|《何山道人水调歌头二十首一韵，余和之，计前后凡八首。道人之语，如谢康乐诗，出水芙蓉，自然可爱，余诚不足以继其后。呜呼，道人死矣，仙耶人耶，皆不知。俟如其数，焚香烧以与之。魂如有灵，当凌云一笑。\\

☆江城子

晓参垂户宿醒醒。坐南亭。对疏星。点点萤光，偏向竹梢明。望断长空何处是，云叶乱，彩霞横。

西楼依旧抱重城。小银屏。此时情。鸦阵翻丛，枯柳两三声。欹枕欲寻初夜梦，鸡

唱远，晓蟾倾。

☆江城子

闻君见影已堪怜。短因缘。偶同筵。相见无言，分散倍依然。做梦杨花随去也，妆合畔，绣床前。

觉来离绪意绵绵。写蛮笺。倩谁传。鱼雁悠悠，门外水如天。欲上西楼还不忍，难著眼，望秋千。

☆水龙吟（寄竹西）

五湖春水茫茫，梦魂夜逐杨花去。汀花岸草，佳人微笑，眼波横注。借问刘郎，心期则甚，一成无据。自春来泪满，揜蓝袖口，没整顿，心情处。

闻道相如病渴，念文君、白头新句。相思两地，无穷烟水，一庭花雾。锦字藏头，织成机上，一时分付。问他年，更有微云淡月，重来兮否。

☆减字木兰花

雨帘高卷。芳树阴阴连别馆。凉气侵楼。蕉叶荷枝各自秋。

前溪夜舞。化作惊鸿留不住。愁损腰肢。一桁香销旧舞衣。

☆减字木兰花

明眸巧笑。坐久更宜灯烛照。小醉辞归。怀抱明明只自知。

琐窗重见。桃李春风三月面。怎不思量。折柳孤吟断杀肠。

☆江城子慢

新枝媚斜日。花径霁、晚碧泛红滴。近寒食。蜂蝶乱、点检一城春色。倦游客。门外昏鸦啼梦破，春心似、游丝飞远碧。燕子又语斜檐，行云自没消息。

当时乌丝夜语，约桃花时候，同醉瑶瑟。甚端的。看看是、榆角杨花飞掷。怎忘得。斜倚红楼回泪眼，天如水、沈沈连翠壁。想伊不整啼妆影帘侧。

☆如梦令

百和宝钗香珮。短短同心霞带。清镜照新妆，巧画一双眉黛。多态。多态。偷觑榴花窗外。

☆极相思

拂墙花影飘红。微月辨帘栊。香风满袖，金莲印步，狭径相逢。

笑靥乍开还敛翠，正花时、却恁西东。别房初睡，斜门未锁，且更从容。

☆极相思

西园斗草归迟。隔叶啭黄鹂。阑干醉倚，秋千背立，数遍佳期。

寒食清明都过了，趁如今、芍药蔷薇。衩衣吟露，归舟缆月，方解开眉。

☆贺新郎（别竹西）

斜日封残雪。记别时、檀槽按舞，霓裳初彻。唱煞阳关留不住，桃花面皮似热。渐点点、珍珠承睫。门外潮平风席正，指佳期、共约花同折。

情未忍，带双结。钗金未断肠先结。下扁舟、更有暮山千叠。别后武陵无好梦，春山子规更切。但孤坐、一帘明月。蚕共茧、花同蒂，甚人生要见，底多离别。谁念我，泪如血。

☆浪淘沙

倚枕数更筹。清夜悠悠。竹风荷露小窗秋。往事迷人浑不省，总是离愁。

无赖是横眸。济楚风流。一时搂揽著心头。调数梦魂将我去，明月重楼。

☆思佳客

深夜槐风析醒惺。露荷凉气满西庭。凭栏小语花梢月，缓步偷拈石上萤。

秋意早，暑衣轻。殢人索酒复同倾。大家沈醉还高枕，一任西楼报五更。

☆二郎神

西池旧约。燕语柳梢桃萼。向紫陌、秋千影下，同绾双双凤索。过了莺花休则问，

风共月、一时闲却。知谁去、唤得秋阴，满眼败垣红叶

飘泊。江湖载酒，十年行乐。甚近日、伤高念远不觉风前泪落。橘熟橙黄堪一醉，断未负、晚凉池阁。只愁被、撩拨春心，烦恼怎生安著。

☆百宜娇

隙月垂簷，乱蛩催织，秋晚嫩凉房户。燕拂帘旌，鼠窥窗网，寂寂飞萤来去。金铺镇掩，谩记得、花时南浦。约重阳、萸糝菊英，小楼遥夜歌舞。

银烛暗、佳期细数。帘幕渐西风，午窗秋雨。叶底翻红，水面皱碧，灯火裁缝砧杵。登高望极，正雾锁、官槐归路。定须相将，宝马钿车，访吹箫侣。

☆醉思仙

断人肠。正西楼独上，愁倚斜阳。称鸳鸯鸂鶒，两两池塘。春又老，人何处，怎惯不思量。到如今，瘦损我，又还无计禁当。

小院呼愁夜，当时醉倒残缸。被天风吹散，凤翼难双。南窗雨，西廊月，尚未散、拂天香。听莺声，悄记得，那时舞板歌梁。

☆眼儿媚

晓钗催鬓语南风。碧涧小桥通。榆阴短短，露光炯炯，满地花红。

天涯不见归帆影，蜂蝶尽西东。宿醒渐解，残妆犹在，晓日帘栊。

☆眼儿媚

循槛琅玕\粉沾衣。一片子规啼。蓬壶梦短，蜀衾香远，愁损腰肢。

石城堂上双双燕，应傍莫愁飞。春江艇子，雪中梅下，知与谁期。

☆梦玉人引

上危梯尽，尽画合迴，昼帘垂。曲水飘香，小园莺唤春归。舞袖弓弯，正满城、烟草凄迷。结伴踏青，趁蝴蝶双飞。

赏心欢计，从别后、无意到西池。自检罗囊，要寻红叶留诗。懒约无凭，莺花都不

知。怕人问，强开怀、细酌酴醾。

☆倾杯令

枫叶飘红，莲房肥露，枕席嫩凉先到。帘外蟾华如扫。枝上啼鸦催晓。
秋风又送潘郎老。小窗明、疏萤浅照。登高送远惆怅，白发至今未了。

☆倾杯令

隔座藏钩，分曹射覆烛艳渐催三鼓。箏按教坊新谱。楼外月生春浦。
徘徊争忍忙归去。怕明朝、无情风雨。珍花美酒团坐，且作尊前笑侣。

☆生查子 摊钱临小窗，扑蝶穿斜径。醉戏晚风前，吹乱连枝影。

别来秋夜长，梦到金屏近。肠断一声鸡，残月悬朝镜。

☆生查子

裙长步渐迟，扇薄羞难掩。鞋褪倚郎肩，问路眉先敛。
踏青南陌回，倚醉开娇靥。今夜更同行，忍笑匀妆脸。

☆生查子

双鬟绿发齐，多笑荐红落。穿竹过西斋，问字时偷学。
娇慵不惯羞，同倚阑干角。屈指数元宵，灯火堪行乐。

☆扑蝴蝶近

分钗绾髻，洞府难分手。离觞短阕，啼痕冰舞袖。马嘶霜滑，桥横路转，人依古柳。
晓色渐分星斗。

怎分割。心儿一似，倾入离愁万千斗。垂鞭伫立，伤心还病酒。十年梦里婵娟，二月花中豆蔻。春风为谁依旧。

☆扑蝴蝶近

风荷露竹，秋意侵疏鬓。微灯曲几，有帘通桂影。乍凉衣著，轻明微醉，歌声听稳。新愁殢人方寸。

怎不闷。当初欲凭，燕翼西飞寄归信。小窗睡起，梁间都去尽。夜长旅枕先知，秋杪黄花渐近。一成为伊销损。

☆一落索

蝉带残声移别树。晚凉房户。秋风有意梁黄花，下几点、凄凉雨。

渺渺双鸿飞去。乱云深处。一山红叶为谁愁，供不尽、相思句。

☆一落索

宫锦裁书寄远。意长辞短。香兰泣露雨催莲，暑气昏池馆。

向晚小园行遍。石榴红满。花花叶叶尽成双，浑似我、梁间燕。

☆一落索

鸟散余花飞舞。满地风雨。长江衮衮接天流，夜送征帆去。

今夜行云何处。断肠南浦。残肠南浦。残灯不剪五更寒，独自与、余香语。

☆谒金门（甲子年同寅伯题于壁）

人已老。春亦不留些少。花尽叶长蚕又抱。子规啼未了。

往事不论多少。且向尊前一笑。白发满头愁已到。路长波渺渺。

☆鼓笛慢

拍肩笑别洪崖，共看紫海还清浅。蓬壶旧约，人间舒笑，桃红千遍。去岁争春，今年逼腊，满空飘霰。渐横枝照水，清绿弄日，都点缀、江南岸。

须吸百川为寿，卷恩波、已倾银汉。戎袍拥戟，万钉围带，天孙新眷。十里尘香，五更弦月，未收弦管。正秦筝续谱，宫箫定拍，候来冬按。

☆西江月慢

春风淡淡，清昼永、落英千尺。桃杏散平郊，晴蜂来往，妙香飘掷。傍画桥、煮酒青帘，绿杨风外，数声长笛。记去年、紫陌朱门，花下旧相识。

向宝帕、裁书凭燕翼。望翠阁、烟林似织。闻道春衣犹未整，过禁烟寒食。但记取、角枕情题，东窗休误，这些端的。更莫待、青子绿阴春事寂。

☆思佳客（竹西从人去数年矣，今得归，偶以此烦全美达之）

曾醉扬州十里楼。竹西歌吹至今愁。燕衔柳絮春心远，鱼入晴江水自流。

情渺渺，梦悠悠。重寻罗带认银钩。挂帆欲伴渔人去，只恐桃花误客舟。

☆思佳客（全美久不通，偶伯禧去，间录前所赋，复作一首）

薄薄山云欲湿花。双双燕子入帘斜。西楼尚记垂垂雪，酌酒犹残片片霞。

人已远，发成华。小楼疏竹宅谁家。试凭去雁通消息，仙子当乘八月槎。

☆夜游宫（生日代人献江宰）

帘外繁霜未扫。楼角动、玉绳横晓。百和交焚瑞烟绕。霁霞明，画屏深，天渺渺。

喜色连池沼。荐眉寿、玉儿娇小。早晚除书下天表。日初长，莫等闲，孤一笑。

☆浣溪沙

风扫长林雪压枝。纷纷冻鹊傍帘飞。一尊聊作破寒威。

春意正愁梅漏泄，客情尤怕病禁持。曲阑干外日初迟。

☆南歌子

片片云藏雨，重重雾隐山。可怜新月似眉弯。今夜断肠凝望、小楼寒。

梦断云房远，书长蜡炬残。夜妆应罢短屏间。都把一春心事、付梅酸。

☆如梦令

珠阁雨帘高卷。望断碧梧墙院。短梦有幽寻，晓枕一峰云乱。谁见。谁见。风散菊

英千片。

☆浣溪沙

微绽樱桃一颗红。断肠声里唱玲珑。轻罗小扇掩酥胸。

惹鬓蛛丝新有喜，窥窗月彩旧相从。清宵一醉许谁同。

☆浪淘沙

凉露洗秋空。菊径鸣蛩。水晶帘外月玲珑。烛蕊双悬人似玉，簌簌啼红。

宋玉在墙东。醉袖摇风。心随月影入帘栊。戏著锦茵天样远，一段愁浓。

☆醉桃源

檀香新染砑红绡。腰肢瘦不胜。合欢小幌掩余醒。芙蓉入梦频。

山不尽，水无情。锦河隔锦茵。刘郎仙骨未应轻。桃花已误人。

☆思佳客

梦里相逢不记时。断肠多在杏花西。微开笑语兜鞋急，远有灯光掠鬓迟。

辞永夜，失深期。一枝黄菊对伤悲。夜凉窗外闻裁剪，应熨沈香制舞衣。

☆小重山

雨洗檐花湿画帘。知他因甚地，瘦厌厌。玉人风味似冰蟾。愁不见，烟雾晓来添。

烦恼旧时谙。新来一段事，未心甘。满怀离绪过春蚕。灯残也，谁见我眉尖。

☆柳梢青

远帘笼月。谁见南陌，子规啼血。萸糝菊英，整冠落帽，一时虚说。

五湖自有深期，曾指定、灯花细说。燕子巢空，秋鸿程远，音书中绝。

☆卜算子 云破月高悬，照我双双泪。人在朱桥转曲西，翠幕重重闭。

要见索商量，见了还无计。心似长檠一点灯，到晓清清地。

☆卜算子

眉为占愁多，镇日长长敛。试问心中有底愁，泪早千千点。

莫唱短因缘，缘短犹伤感。谁信萧郎是路人，常有深深念。

☆卜算子

一日抵三秋，半月如千岁。自夏经秋到雪飞，一向都无计。

续续说相思，不尽无穷意。若写幽怀一段愁，应用天为纸。

☆卜算子

得酒解愁烦，多病还疏酒。本是多情失意人，此味如何受。

沈醉且高歌，不饮心常有。守著残灯斗著眉，怎不腰肢瘦。

☆如梦令

多谢西池桃李。伴我一春沈醉。能有几多香，陪了一江来泪。憔悴。憔悴。又是落花铺地。

☆木兰花慢

石榴花谢了，正荷叶、盖平池。试玛瑙杯深，琅玕\簟冷，临水帘帷。知他故人甚处，晚霞明、断浦柳枝垂。唯有松风水月，向人长似当时。

依依。望断水穷，云起处、是天涯。奈燕子楼高，江南梦断，虚费相思。新愁暗生旧恨，更流萤、弄月入纱衣。除却幽花软草，此情未许人知。

☆木兰花慢（重午）

对修篁万个，更疏雨、洗琅玕\。望燕外晴丝，鸥边水叶，胡蝶成团。榴红劝人把酒，泛菖蒲、对客不成欢。金缕新番彩索，始知今岁衣宽。

年年。此日青楼，花缺处、倚阑干。记小扇清歌，蛮笺妙墨，不觉更残。可怜旧游

似梦，向人人、未减一枝兰。纵有千金莫惜，大家沈醉花间。

☆木兰花慢（七夕）

桂乡云万缕，更飞雨、洗香车。念密会经年，银潢浪阻，玉露期赊。灵星瑞桥对展，散匆匆、喜色满天涯。回首丁宁晓角，未宜吹动梅花。

家家。竞赏彩茸，穿桂影、醉流霞。渐舞袖翻鸾，歌声缀凤，钗影交加。人间共饶宴乐，算天孙、怎忍遣河斜。莫惜西楼剪烛，大家同到啼鸦。

☆恋香衾

记得花阴同携手，指定日、许我同欢。唤做真成，耳热心安。打叠从来不成器，待做个、平地神仙。又却不成些事，蓦地心残。

据我如今没投奔，见著你、泪早偷弹。对月临风，一味埋冤。笑则人前不妨笑，行笑里、斗觉心烦。怎生分得烦恼，两处匀摊。

☆豆叶黄

芰荷香外一声蝉。风撼琅玕惊昼眠。刻烛题诗花满笺。小神仙。对倚阑干月正圆。

☆豆叶黄

晚妆新试碧衫凉。金鸭犹残昨夜香。柳际风来月满廊。一双双。人对鸳鸯浴小塘。

☆豆叶黄

轻罗团扇掩微羞。酒满玻璃花满头。小板齐声唱石州。月如钩。一寸横波入鬓流。

☆豆叶黄

林花著雨褪胭脂。叶底双桃结子迟。对镜凭郎略皱眉。笑微微。燕子羞人必懒归。

☆豆叶黄

玉箫风外一声清。粉面婵娟月对明。紫府楼台夜不扃。羽衣轻。稳驾双鸾谒帝庭。

☆千秋岁

宝蟾悬镜。露颗倾荷柄。飞萤点点明花径。凝愁情不展，宿酒风还醒。天似晓，银河半落星相趁。

心事都无定。才致元相称。春过了，秋将近。小窗通竹圃，野色连金井。得仗个，多情燕子分明问。

☆好事近

心事已成空，春尽百花零落。谁见黄鹂百啭，索东君评泊。

晓来枝上语绵蛮，应悔向来错。看则绿阴青子，却恹惶无托。

☆南乡子

小雨阻行舟。人在烟林古渡头。欲挈一尊相就醉，无由。谁见横波入鬓流。

百计不迟留。明月他时独上楼。水尽又山山又水，温柔。占断江南万斛愁。

☆南乡子

樊子唤春归。梦逐杨花满院飞。吹过西家人不见，依依。萍点荷钱又满池。

屈指数佳期。何日凭肩对展眉。倾尽十分应不醉，迟迟。何惜樱桃杏子时。

☆浪淘沙

纤指捧玻璃。莫惜重持。自离阆苑失回期。门掩东风桃著子，帘影迟迟。

楼上正横篴。荷气沾衣。谁将名玉碾花枝。不比寻常红与紫，取次芳菲。

☆卜算子

□□矣，余为之辍笔。昨夜酒醒，卧不能稳，试作卜算子以寄之\\

渡口看潮生，水满蒹葭浦。长记扁舟载月明，深入红云去。

荷尽覆平池，忘了归来路。谁信南楼百尺高，不见如莲步。

☆小重山

云护柔条雪压枝。斜风吹绛蜡，点胭脂。蔷薇柔水麝分脐。园林晚，脉脉带斜晖。
深阁绣帘低。宝奁匀泪粉，晚妆迟。一枝屏外对依依。清宵永，谁伴破寒卮。

☆惜分钗

春将半。莺声乱。柳丝拂马花迎面。小堂风。暮楼钟。草色连云，暝色连空。重重。

秋千畔。何人见。宝钗斜照春妆浅。酒霞红。与谁同。试问别来，近日情惊，忡忡。

☆惜分钗

重帘挂。微灯下。背兰同说春风话。月盈楼。泪盈眸。觑著红裯，无计迟留。休休。

莺花谢。春残也。等闲泣损香罗帕。见无由。恨难收。梦短屏深，清夜悠悠。悠悠。

☆如梦令

花趁清明争展。白白红红满院。莫怪泪痕多，爱底不能得见。凝恋。凝恋。门外雨飞帘卷。

☆水龙吟

年年九月西湖，绣船继日笙箫拥。五云深处，红帘一桁，语莺歌凤。群玉峰头，影娥池畔，烟霞飞动。认蓬瀛仙子，云程路远，贪人世、瑶池梦。

要看黄尘清海，戏真珠、麻姑清纵。曲门自有，菊金芳砌，月篴浮栋。子著宫桃，舞翻官柳，霞杯纤捧。待明年更把，西风妙曲，按成新弄。

☆鹊桥仙

西风不落，薄衾孤枕，记起花时些个。宿愁新恨两关心，说道理、分疏不可。

别愁如絮，佳期何在，古屋萧萧灯火。打窗风雨又何消，梦未就、依前惊破。

☆点绛唇（圣节鼓子词）

扇列红鸾，赭黄日色明金殿。御香葱茜。宝仗香风暖。

咫尺天颜，九奏朝阳管。群臣宴。醉霞凝面。午漏传宫箭。

☆点绛唇

俊眼犀心，尊前如有乘鸾便。过愁传怨。只许灯光见。

见了重休，河汉明遮断。深深院。乱风飘霰。揉了双罗燕。

☆水调歌头

解衣同一笑，聊复起厨烟。醉乡何处，与君舒啸入壶天。长怪时情狭隘，杯酒岂容我辈，不上谪仙船。雅志念湖海，小艇一丝竿。

夜迢迢，灯烛下，几心闲。平生得处，不在内外及中间。点检春风欢计，惟有诗情宛转，余事尽疏残。彩笔题桐叶，佳句问平安。

☆好事近

世事莫牵萦，乐取这闲时节。且恁醉来醒去，免光阴虚设。

有则有个泼心儿，不敢被利名啜。却待两手分付，与风花雪月。

☆好事近

长记十年前，彼此玉颜云发。尊酒几番相对，乐春花秋月。

而今各自困飘零，憔悴几年别。说著大家烦恼，且大家休说。

☆青玉案

一尊聊对西风醉。况九日、明朝是。曾与茱萸论子细。江天虚旷，暮林横远，人隔银河水。

碧云渐展天无际。吹不断、黄昏泪。若作欢期须早计。如何得似，鬓边新菊，双结黄金蕊。